

GUITS NE PQUIAA

SANTIAGW

1 ¡Diuzh to grëse to!

Naa nac Santiagw, tib zha ne quiayun xtsiin Dios, tib zha ne quiayun xtsiin Jesùs, men ndzon ne rnabey. Laa naa rquiaabdiuzh to grëse to ne nac to zha ne ziaad lo xtii Israel, tel pa lotaa nac guidzliu ne no to.

²Bets, bzian, ndal ncuaane rded ne parne glu dien pe nli dib zdoo ne rnalo ne Dios. Tel pe nactaa ncuaane noded to i, ib gacmbande to, sinque golley.

³Sac gon, zeene squi ran ne grë pe guielnë, ga rseed ne titliladz rac ne tel petaa noded ne. ⁴Golseed sca titliladz golgac. Ib guiaand zdoo to tel petaa nac guielnë ne gan to! Sac zeene sca cseed to gan to guielnë, zac to tib zha ne dziits so lo Xtiidz Dios, tib zha ndzinli, tib zha ne ib peet gdiebd.

⁵Zha ne racladz ycaa guielbiini co, zac gnab zhow lo Dios, ni mesi gon zdeed mew; sac guielbiini ne gnabtaa ne lo me zneedz mew. Led yed me yca, led yed me glisqui pe nacne pe gnab ne lo me. ⁶⁻⁸Lëeraasi dib zdoo ne none gnab new, nodne gacchop guic ne; sac zha ne racchop guic, gdzind dze ycaa zho miñe rnab zho. Nac zho, tib dze dib zdoo zho rliladz zho zgaa zho miñe rnab zho, stibgaa dze na rliladzdraa zhow, ib ractiblid guic zho; masaque nac zho zig nac grë mtsiin ne rbib lo nisdoo, sac tel mtsiin co loxaque nëzrii nëzrec zienie mew.

⁹No zha bets ne, zha bzian ne, quianied zho ncuaane yquiin zho, par miech peet nond zho; per none gon iné gley zho sac nroob non zho lo Dios. ¹⁰⁻¹¹Scagaa zha ne rapchen, none iné gley zho niina ne biaanwin zho, sac nëz lo Dios grë ncuaane rap zho nonda. None guien zho niicle ne nroob rapchen zho, zeene laa zho gbi lo guidzliu rii nuque guiaan grë ncuaane rap zho. Masaque nacse zho zig nac guieen grë guizh ye, tel guiee cow, zhixtsëëse ngbidz rcuiidz guizh ne zoba lo, rlozh ga rliaalgaw, gataa rnitlo xquielniowa.

¹²Dichos zha ne ib rzozite lo Dios niicle no nzian ncuaane rcheep zho guncetal zho xtol zho, per rund zhow; sac zha cosi zgaa zho tib guielmban ne gdzind dze lozh, guielmban ne bnelle Dios gdeed me lo grëse zha ne rleynie me.

¹³Zeene sca no ncuaane rcheep ne guncetal ne xtol ne, guiaabd ne togo Dios noquiil ne gun new; sac gon led yed Dios rzooblacz ncuaane ndzinlid, ni niicle

rquiildgaa me miech gun zhow. ¹⁴⁻¹⁵Grë ncuaane ndzinlid ne rzoobladz ne, grë ncuaan yozh ne rionie guic ne, miŋ co nac miŋe rquiil ne. Lëew nac miŋe rcheep ne runctal ne xtol ne, ni ndionle ne ganle, lëe gdib mine gdeed dol lo miech nac guielnë dox ne ycaa zho.

¹⁶Bets, bzian, gac-wete to sca. ¹⁷Golguien ganle, ncuaane rquiin, ncuaane ndzinli, miŋ co nac miŋe rneedz Dios. Tibaque nac me, led yed me rdzëë par guiaab ne meque rnabey rac guielntseeb. Me nac tib biini ne gdzind dze guiuu, ni tib lë guielcow guienz zaatne no me. ¹⁸Zdoo me gola bneedz me tib guielmban ndzon lo ne niina ne laa bliladz Xtiidz me, masaque rrieequia ne nac mœädglo lo me.

Nacda yquiaadiagse miech Xtiidz Dios

¹⁹Bets, bzian, ne nac to zha ne rleynie naa: Golgacnan ganle, ne ne nac ne zha ne no xnëz Dios, none dzioxcoraa ne yquiaadiag ne, zeene gnee ne none guien ne pa lotaa gnee ne, ni gun ne ne rnadse pew laa ne glëele. ²⁰Sac gon, zeene rlëe ne, grieelod gun ne ncuaane rdziladz Dios. ²¹Golguien sca, golsaan grëtaa ncuaane ndzinlid ne ziyun to, golbiche lo grë guielntseeb ne znutaa quiayac niina. Ine ndooladz golgac, golleynie Xtiidz Dios, diidz ndzon ne pseedle to; sac gon lëew rlu zha laa to lo dol.

²²Per guiaabde to togo loxaque yquiaadiagse to Xtiidz Dios lëélew ga; sinque ib none gban to miŋe rquiaadiag to, sac tel ib gbande tow lëéque to noquidie to ga. ²³Sac zha ne rquiaadiag Xtiidz Dios, ni rband zhow, rzac zho zig rzac ne zeene rwi ne lo ne lo quiewan: ²⁴Sac zeene nowi ne lo quiewan, hor cose ran ne zha rac ne; zeene laa ne rbiche low rsoladzdraa ne zha rac lo ne. ²⁵Sangue zha ne rquiaadiag Diidz Ndzon ne rlu zha laa miech ga, ni zigne rquiaadiagse zhow scasaque rioxco zho rban zhow, zha cosi ib zuŋlay Dios zho lo grëtaa ncuaane gun zho.

²⁶Gacxe waa, zha ne rnee xnëz Dios no zho ni rgobeyd zho pe rnee zho, lëéque zha noquidie zho ga, ga rlu nlid zienal zho miŋe rnabey Dios.

²⁷Sac gon, par Dios men ne nac Pxoz ne, zha ne no xnëz me none tsie zho tsiegun zho xyudar grë mœädbziab, tsiegun zho xyudar grë wnaa ne ret tsieel, ni tsoxco zho zaacse gban zho, ib tsienald zho ncuaane ndzinlid ne run grëraa miech.

Lëda ga run zha ne rbe

2 Bets, bzian, gunde to ne ncueese lo miech ne gnee to, sac zha ne sca run, zha dien guiaab zho xnëz Jesús no zho. ²⁻³Ron naa, zeene rlanso tib zha ricw zaatne rcaalsa to i, nacw zho xab niazh zho, no grë xnil or zho nia zho, lëéléd rio to dien pa lo wenraa sob zho; laa zeene rlanso tib zha mban beelze nac xab yeen, rnee to lo zho: “Ise bzo, telne racladzgaa luu sob luu, lo liuse i bzob.” ⁴Pe sca na rac zha ne no xnëz Jesús? Zha ne gon sca run, ga rlu zho niapse guielntseeb no guic zho.

⁵Lëda ga gonl bets, lëda ga gonl bzian. Golgacnanganle, ible Dios ble miech ne peet rapd lo guidzliu rii, zeena dib zdoo zho gnalo zho me, zeena ycaa zho zaatne bneele me gdeed me cuëz zha ne noxco rleynie me. Gotsaa gwi ne sca ganle, zha ricw nac zho nëz lo Dios; ⁶laa to gonl, no to rlozhd gzhidznie to zho. ¿Pe ib riënde to, grë zha ricw co nac zha ne rsaci to? Rgobniu zho to, riezo zho to lo wxtis; ⁷haxta rdzibdee zho Jesús, menl ndzon ne nacnie to niina.

⁸Ib none gban ne zigne rnabey Xley Dios, lo xley me zhobnee: “Bleyne samiech luu, zigne rleynie luu luu.” ⁹Golguiengon, doll i noyul to squi rbe to dienl cho nac zha ricw, chogaa nac zha mban; sac Xley Dios i quiaguiits to.

¹⁰Golgacnanganle, zha ne rguiits tibaque xley Dios, niicle maase zienal zho grëraaw, laa zho beenltal-le xtoll zho ga, rzacaque zho zig zha ne noguiits grëw. ¹¹Sac tibaque menl ne psala grësew. Gacxe waa, tell zha ne zienal miñe rnee: “Gute luu samiech luu”, per rguiits zho miñe rnee: “Yquiangobd luu zha ne led tsieeld luu”, laa zho beenltal-le xtoll zho ga.

¹²Niowse sca golgac, niicle zeene gneegaa tow, niowse golnlee; sac gonl, zdzinl dze cxobdol ne dienl pe wban ne zigne rnabey Jesús, te wband new ye.

¹³Grë zha ne ni lalnu rquiad zdoo samiech, gal dze co scaque ni lalnu yquiad zdoo Dios zho; sangue zha ne rquia zdoo samiech, ible zdedlaa zho lo guielnë dox ne cxeell me.

Zha ne rnalo Dios none glu zhow

¹⁴Bets, bzian, ¿pa dienl rquiin guial ne dib zdoo ne rnalo ne Dios, xnëz me no ne, ni tell rund ne xyudar samiech ne? ¿Niacxe scase laa Dios csilaale ne?

¹⁵Gzoob ne no zha ne naçgrë to i, yase tib bets tow, tib bziangaa tow, ranlo to guield xab zho, niicle quianied zho ncuaane gow zho; ¹⁶ni guial to lo zho: “Csacsid luu luu, got xabnal luu, dow ncuaane racladz luu”, per loxaque diidz sca guial to, ni gdeete to ncuaane runl falt lo zho. ¿Pa dienl yquiin diidz co?

¹⁷Scadaa nagonl paat rquiinda guial ne rnalo ne Dios, ni tell rund ne miñe rieguiall ne gunl ne. ¹⁸Gacxe waa, zha ne rnalo Dios ni runl zho miñe rieguiall zho, no zho gnë lëda i runl zha ne rnee lëëlew ga totsaque gnalo ne Dios. Ni rap zho rson, sac grieelod glu ne rnalo ne me, tellne runl ne miñe rieguiall ne.

¹⁹Nli wena runl zha ne rliladz tibaque Dios no, per grieelod guial zho lëëlew ga, sac gonl zig nac mendox ye ma rliladz tibaque Dios no, per led por minlcod laa ma lo guielnë ne cxeell me, sinque haxta rdzieb ma me. ²⁰Nadzpaa nxen zha ne sca rzac, pe ni lalnu riënd zho paat rquiinda guial zho rliladz zho Dios ni tellne runl zho miñe rieguiall zho.

²¹Golganganle, zig nac pxozgol ne Abraham, porne beenl me miñe rieguiall me game pcaania Dios me zig tib zha ne peet xtoll. Led rsoladz to ganle, zeene rëb Dios lo me tsielogon me xpëed me, güey me zaatne pxeell Dios me. ²²Gotsaa gwi ne ganle, zeene beenl Abraham miñe bnabey Dios me ga, ga blu ne nli rnalo me Dios, ni hor co mazdraa dib zdoo me bnalo me Dios. ²³Lo Xtiidz Dios zhobnee ne scataa dib zdoo Abraham bnalo me Dios, gane pcaania Dios me zig tib zha ne peet xtoll; zëëb diidz, tib zha ndzieeldiidz Dios goc me.

²⁴Golgacnan sca ganle, led loxaque gliladzse miech Dios, laa me ycaaniale zho; sinque none glu zho nli rliladz zho me, gun zho miñe rnabey me zho. ²⁵Golsoladz ganle, scaque wnaa ro nëz ne brieelë Rahab, por been me xyudar samiech me, gane pcaania Dios me zig tib zha ne peet xtold; sac zeene gon me noxtseeb zha ne pxeel Josué zie wleets ga, bdeed me zaatne biolan zho, ni blu me stib nëz ne wbire zho, bgaad zho. ²⁶Gase na ganle rlu, paat rquiinda guiaab ne rliladz ne Dios ni tel rund ne miñe rieguial ne, nacse ne dzigo zig tib xcuerp ngutoo, tel cuerp cow, ¿pa dien yquiina?

Ncuaane run ludz miech

3 Bets, bzian, guiabde to lega tso to glisqui to ncuaane run stib miech, sac tsod zha ne demaste wen lo guidzliu rii. Zha ne sca run, rzac zho zha so cseed zho miech, per gacnan zho ganle zha ne rseed miech, mazdraa nroob ncuaane tsasqui lo zho gal dze ne laa zho gacredz lo Dios.

²Grëse ne nzian mod ne rxin ne lo samiech ne. Tel niaca miñe no tib zha ne grieelo ycuëëz ludz pa lotaa gnee zho, zha cosi cxind zho, haxta xcuerp zho zrielo zho gnabey zhòw. ³Gotsaa gwi ne ganle zig nac guay, con tib lë win guiib ne rgo miech ro ma rrielo rnabey zho ma, rienie zho ma nëz ne racladztaa zho. ⁴Scaque barcw, niicle ne nrooba, no hor rriee me dox lo nis rcheepa, per con tib lë yag lag win ne rsëë miecha, rrielo rienie zhòw nëz ne racladztaa zho. ⁵Scapaa nagon nac ludz ne; niicle ne winsew, per nroob guielqui ne runa. ¡Ran to ganle tib bzhil yeense name rzobgui dan! ⁶Ni tel ludz ne gon, rrieequia tib bel ga naca. Tib lë win xcuerp ne naca, per guielqui nroob ne runa, runctala xtol miech. Gun ne cuent tib lë gui ne briee gabil naca; ni dipse lo xquielmban miech noxtseeb zho low.

⁷Golwi ganle, rrielo miech runndoo zho grë ma ne rsiibe, grë ma ne rzelen liu, haxta grë ma ntseeb, haxta grë ma ne no nisdoo, rnabey zho ma. ⁸Per guienz zha ne gon grieelo gnabey ludz; ncuaane ntseeb naca, choot grieelod gnabeya; masaque laaw no par gnitlow miech, zigne run grë guizh ncuaan. ⁹Lëew name rquiin ne roolnie ne Dios men ne nac Pxoz ne, ni rlozh ga lëequew rdzibdee ne samiech ne, ni lalnu riend ne me bzaa zho, biaan zho zigne rlu me. ¹⁰¿Pe ga nadien, ro ne roolnie ne Dios, ni roque ne rgodee ne samiech ne?

¹¹Bets, bzian, led scada gon. Zig nacse tib zhlian, ¿niacxe zaatne rlanaque nis nex gaque rlan nis yuzed? ¹²Tib yag nexgaaw, ¿niacxe rquia xnex yag oliv lo yag guigw, yquiaagaa guigw lo lbë uv? Nanle to ganle racd min co.

Zha ne nixbiini

¹³Lo grë zha ne nacgrë to i, tel no zha ne rzac zha nixbiini nac zho, none glu zhow iné zaacse gbannie zho samiech zho, gac zho tib miech ndooladz zig none gac tib zha nixbiini. ¹⁴Per tel tibaque në rac zdoo zho ran zho zha ne stib noded, tibaque noguib zho csanwin zho samiech zho; gacnan zho ganle, led scad rac zha nixbiini. Ni lalnu rieguiald tso zho csanziuu zho zho.

¹⁵Led scad nac guielbiini ne rdeed Dios, sinque lëë zhiwseed mendox ga, lëë miñ co zienal grëraa miech guidzliu. ¹⁶Zeeñe sca në rac zdoo miech ran zho cho stib noded, zeene sca tibaque no zho dien zha guianglaa zho lo samiech zho, loxaque dil, loxaque grë guielntseeb rzobni zho ga. ¹⁷Zha ne nli rap guielbiini ne rdeed Dios, rund zho miñ co, laa zho zienal:

ndzinlise gban zho,
rleynied zho dil,
rguib zho zaacse rnee zho lo miech,
wen rac zho lo grëse miech,
rquia zdoo zho samiech zho,
rund zho cue zho zha ne mazdraa gacnie zho,
ncuaane run zho dib zdoo zho run zhow,
niapse ncuaane ndzinli rioxco zho.

¹⁸Zha ne sca rleynied dil, rioxco zho rnee zho lo miech tipse gac zho, tipse gnee zho; scagaa rdzin dze ne ran zho zeeñe laa grë miech co rac tib miech wen.

Zha ne rleynie guielntseeb

4 Ne squi tibaque rlëelsa to, tibaque quiadił to, lëë miñ qui gon riegal por grë guielntseeb ne rio guic to. ²Rio to riogui to ncuaane grieelod yquianie to, rlozh ga, haxta rut to samiech to parne yquianie tow. Në rac zdoo to ran to cho zha quianie ncuaane quianiede to, zeeñe ran to rrieelod yquianie tow laa to rlëenie zho, haxta rdilnie to zho. Rrieelod yquianie to ncuaane racladz to, sacne rnabde tow lo Dios. ³Niicle tel rnabgaa tow lo me, rneedzd mew, sacne laa guic to zienie yquianie tow loxaque par gdeedgxxt zdoo to, gdeedgxxt xcuerp to.

⁴¿Que tal ntseeb to! ¿Pe ib riende to, Dios gon rlëenie to zeeñe squi rio to rleynie to grë guielntseeb? Sac miech ne squitaa rleynie guielntseeb, lo Dios ga racntseeb zho. ⁵Golgan ganle, zha rnee lo Xtiidz Dios: “Espíritu Sant, men ne pxeel Dios nacnie ne, rleynie me ne, ni racladzd me zhaa ncuaane gleynie ne laa ne gleynie ne me.”

“Ni tel Dios gon, noxco me ne, ib zacnie me ne greee ne lo guielntseeb; sca rnee lo Xtiidz me, zaatne rnee: “Zacniñ Dios grë zha ndooladz, sangue grë zha niats, rdziguend me zho.”

⁷Golguien sca, ine ndooladz golgac, golgon mine rnabey Dios. Gdeetraa to diidz yquiił mendox to, sca golgun zeeña zhal ma gbiche ma lo to. ⁸Dib zdoo to golséeb xnëz Dios, zeeña scagaa me zacnie me to. Goltoxco guiaanmbe to lo grëtaa xtol to, golnab lo me csañmbe me zdoo to, mese gnalo to, gacchopdraa guic to. ⁹¡Golguien ganle, ndzinlid i squi mban to! ¡Mban golgac, goltsø guielnë, golgoon, laa ne tso to gzhidz to, laa ne tso to gley to! ¹⁰¡Ndooladz golgac lo Dios, zeeña cuee me to lo grë ncuaane nac to, csanglaa me to!

¹¹Bets, bzian, ib gneenëde to zha ne nacgrë to. Zha ne rneenë bets zho, bzian zho, bel zho, ni rdziibdol zho zho, Xley Dios ga rguits zho. Laa ne so zho gacladz zho zha gun guielwxtis, mazd tsoxco zho gban zho zigne rnabey

ley. ¹²Golguien ganle, Dios psan ley, ni mese rieguial gun guielwxtis, me nan cho cuibdol, chogaa csilaa me; per to nadien, ¿cho nac to par gdziibdol to samiech to?

¹³Togaa ne nac to zha ne rnee: “Na gzhe widz dien pa tib guiedz ne guioo ne, guobiaaz ne ga tib iz, ga dziuun ne wzi dziuun ne wto, dziuunlo ne dimi”, golquiaadiag miñe gne naa lo to ganle. ¹⁴Ne sca rnee to, ¡pe wen wen nan to dien yo to gzhe widz co! ¿Pe rande to lega nacse xquielmban ne zigne nac xcowlas ne rbe ral sil? Zhisaque rbew, zeene rlozh ga rludraa dien yow. ¹⁵Mazd golguiab: “Telne zneedz Dios diidz gbanraa ne, miñ rii, miñ rii dziuun ne.” ¹⁶Led tsode tibaque guielniats qui zienie guic to, golguien guielntseeb ga run zha ne rac niats. ¹⁷Ni golsoladza ganle: Grëse zha ne nanpaa pe nac ncuaane ndzinli ne no gun zho ni rund zhow, xtol zho ga runctal zho.

Zha ricw ne zienal guielntseeb

5 ¡Grë zha ne rapchen, zha ne zienal loxaque guielntseeb, golquiaadiaga ganle! Golgoon, golquiaadan redz niina, sac gon nroob nac guielnë ne gan to. ²Grë ncuaane beenlo to i, peet nonda, lega naca zig nac grë ncuaane biodzle; grë xab to i, rriequia ncuaane dowle mxila. ³Grë guuib or, grë guuib plat ne squitaa quianie to, rriequia noloozhle bioochena; ni scadaa gon nitlo to, masaque gac to zig tib ncuaane riab lo gui.

Laa to beenlo grëtaa dimi qui, rzac to lëew yquiin to len dze ne ziaad, ni nande to gon laa dze ne nitlo to ziaadyoble. ⁴Lëë grë dimi qui gon zëëb to lo grë zha ne quia xtsiñ to, noquidie to zho rguizhde to xtse zho. Per golgacnaña ganle, grëse redz ne rquiaa zho zeene mban rac zho squi rsaci to zho, laa Dios binlew. ⁵Lo grëtaa iz ne mban to lo guidzliu rii, loxaque grë ncuaane gdeed guxt zdoo to, grë ncuaane gdeed guxt xcuerp to noxco to, ncuaane yozh ne riaabtaa guic to laa to runa, ib riende to laa dze ne nitlo to ziaadgaxle. ¡Lëë to noyuñ xcuent ma ne noro par guet ma! ⁶Pe zhistaa guielntseeb ne quiayun to, haxta zha ne peet xtold, zha ne nañ glis nia lo miech, rquiaqui to zho ncuaane rund zho, rnabey to ret zho.

Nodne guieed zha ne rnalo Dios

⁷Bets, bzian, sangue to gon tibleque golgac haxta gan to gdzin dze ne laa Jesús guiaad stib, tel petaa run miech to peet tsienied guic to. Golgac zig zha ne ran, tel zha cow, zeene rlozh rlaal zho bni liu, tibleque rac zho gdipse len mëë guie, rquiambëz zho haxta rdziñ dze ne rlaap zho. ⁸Tibleque sca golgac. ¡Ib guiaand zdoo to, sac gon zhile gdziñ dze ne laa men ndzon ne rnabey ne guiaad stib!

⁹Ib tsode to guieednie to grë zha ne nacgrë to, zeena gunctalde to xtol to; sac zhile gdziñ dze ne laa men ne no gun guielwxtis guiaad. ¹⁰Golsoladz ganle, grë zha ne biadteed xtiidz Dios padzeela, niicle nroob guielnë gon zho, per tibleque goc zho. ¹¹Zig nac Job, nañaxe to ganle zha nactaa guielnë ne gon Job, per ib bieete me, ni blozhse gon me guielnë co nroobraa guielnzaac ne bdeed

Dios lo me. Ga rlu gaṅle, zha ne sca rdeed me diidz raṅ guielnē, led lega rand zhow; sac nquialadz me miech, rquia zdoo me zho. Dichos grë zha ne sca nac.

¹²Bets, bzian, zeene tsiegala glu to diidzli rnee to, tsode to gzeet to gbaa, gzeetgaa to guidzliu par gliladz miech xtiidz to; guiab to: “Lépaa gbaa qui”, “lépaa guidzliu rii”, dien peragaa gzeet to. Tib diidz ne nliw, golguiab: “Nliw”, tib diidz ne nlidgaaw, golguiab: “Nlida”, zeena gun᷑talde to xtol to; sac gon zha ne run᷑tal xtol, ible zgaa zho guielnē ne csiaab Dios.

¹³Lo grë to, zha ne no pe tib lo guielnēw, gnab zho lo Dios gacnien me zho. Zha ne no pe tib guielbleya, goolnie zho me. ¹⁴Zha ne rzacn᷑gaaw, gnabey zho gacredz bla zha ne zo lo to, zha co qu᷑eb nceit guic zho gnab zho lo Dios guiac zho. ¹⁵Telne dib zdoo zha co gnab zhow lo Dios, zunguiac Dios zha rzacn᷑ co. Zlische me zho lo xquielguidz zho, ni tel por pe falt ne beengaa zho lo me sca rzacn᷑ zho, zuṅ me zhow perdon.

¹⁶Gacxe waa, tib tib to zeene run to pe tib falt, yqueetsde tow, golzodiidza lo zha ne nacgrë to, lozhse ga golnab lo Dios gun me to perdon, zeena guiaan᷑mbe to lo me. Sac tib zha ne biaan᷑wenle n᷑z lo Dios, zeene sca pe rnab zho lo me run mew, niicle ncuaane mazdraa ngana.

¹⁷Golsoladz Lí gaṅle, men ne biadteed xtiidz Dios lo miech padzeela, samiechaque new, per dib zdoo me bnalo me Dios. Tib dze bnab me lo Dios csiaabd Dios nisguie, ni scase goca, dipse len tson iz grol ni tib lab nis guie biabd; ¹⁸haxta bnabraa me lo Dios guiana stib, dzigoraa biaba, laa guidzliu biire bdede guielnzaac.

¹⁹Bets, bzian, tel cho tib zha ne nacgrë to i sozit lo Xtiidz Dios, ni grieelo cho tib to ctsire zho n᷑z yozh ne zie zho ga; ²⁰golgacnaṅ gan᷑le, ladzniale guielgut ga rsilaa zho zho, grëse xtol zha co zuṅ Dios zhow perdon. *Santiagw*